



Broj: 01-226/14  
Vareš, 30.10. 2014. godine

**Z A P I S N I K**  
*s 21. sjednice Općinskog vijeća Vareš,  
održane 31.07. 2014. godine*

Zdravko Marošević – predsjedavajući Općinskog vijeća Vareš, otvorio je 21. sjednicu s početkom u 16,00 sati, u velikoj sali Općine Vareš.

Izvršena je prozivka vijećnika.

**Prisutni vijećnici:** Ismet Abdulahović, Boško Andrić, Zdravko Barkić, Mahira Brkić, Tajiba Brkić, Asmir Čizmo, Zdenko Franjić, Osman Ibrišimović, Emir Islamović, Kenan Kamenjaš, Demo Kevrić, Zdravko Marošević, Mario Mirčić, Safeta Muftić, Mato Pavić, Elvir Rožajac, Jasmin Salketić, Goran Selak i Nikola Šimić.

**Odsutni:** Nema

Pored vijećnika sjednici prisustvuju: Općinski načelnik – Avdija Kovačević, sekretar Općinskog vijeća - Leon Pavlović, pomoćnici općinskog načelnika, ispred Službe za privredu i finansije – Senad Mahmutović, ispred Službe za prostorno uređenje i obnovu – Nermin Aščerija, predsjednici političkih stranaka i poslanik u Skupštini ZDK – Fahrudin Brkić.

Sekretar OV Leon Pavlović izvijestio je Vijeće o realizaciji Zaključaka sa 20. sjednice OV održane 23.06.2014. godine. Na 20. sjednici OV donesena su dva (2) Zaključka koja su i realizovana. Postavljena su dva (2) vijećnička pitanja, na jedno vijećničko pitanje nadležni su dostavili pismeni odgovor podnosiocu pitanja a sa drugim postavljenim pitanjem-preporukom, upoznati su nadležni zaduženi za realizaciju istog.

Općinski načelnik Kovačević Avdija u okviru aktualne problematike na području općine Vareš, za današnju sjednicu nije imao obraćanje.

*(Vijećnička pitanja)*

**Elvir Rožajac**

Izjavio je da je nezadovoljan u vezi postavljenih vijećničkih pitanja koja se odnose na sanaciju ambulante u MZ Ravne o čemu je dao pojašnjenje.

1. Pitanje vezano za stradalo stanovništvo prilikom protekle elementarne nepogode – Šta je Općina uradila po pitanju zbrinjavanja porodica koje su napustili svoje domove uslijed elementarnih nepogoda? Apeluje da se pomogne porodici sa Striježeva. Dao kraće obrazloženje.

2. Zašto ograda na mostu (kod Centra) koja je oštećena padom grane nije sanirana i ko je odgovoran? Dao kraće obrazloženje.

### **Ismet Abdulahović**

3. Dokle su stigli pregovori o Profesionalnoj vatrogasnoj brigadi, obzirom da po Zakonu o državnoj službi Profesionalna vatrogasna jedinica pripada civilnoj zaštiti, odnosno Jedinstvenom općinskom organu? Da li su prestali pregovori oko transfera Profesionalne vatrogasne jedinice za JP ŠPD?

### **Demo Kevrić**

Izjavio je da nije dobio odgovor koji se odnosi na odvoz trupaca i ponovo insistira na istom.

4. Traži da nadležna Služba izlista kartice za sve mjesne zajednice, da se vidi koje su MZ i koliko potrošile sredstava u 2013. godini po svim elementima.
5. Traži da se što hitnije izvrši posipanje materijala na dionici puta Striježevo-Kokošići.

### **Mahira Brkić**

Izjavila je da nije dobila odgovore na dva postavljena vijećnička pitanja na sjednici održanoj 29.05.2014. godine.

6. Za period 01.01.2014. – 30.06.2014. godine isplaćeno je 4533,00 KM iz općinskog budžeta na ime pomoći pojedincima iz materijalno-socijalne sigurnosti, nezaposlenim licima. Traži se od nadležne službe ili načelnika da dostavi spisak lica kojima je izvršena pomenuta isplata sa navedenim iznosima za svakog korisnika pojedinačno.
7. Tražim od nadležne službe, odnosno načelnika da dostavi spisak stipendista kojim su isplaćena sredstva iz općinskog budžeta u periodu januar-juni u ukupnom iznosu od 2090,00 KM, te uz imena dostaviti i pojedinačne iznose za svakog stipendistu.

### **Zdenko Franjić**

8. Da li se i šta radi na poboljšanju kvaliteta vode na gradskom vodovodu i da li su izvorišta sa neispravnim vodom adekvatno označena? Dao kraće obrazloženje.

Predsjedavajući OV stavio je na raspravu Zapisnik sa 20. sjednice OV.

Nije bilo primjedbi i predsjedavajući OV stavio je na izjašnjanje Zapisnik sa 20. sjednice OV, te nakon izjašnjavanja vijećnika konstatuje da je **Zapisnik sa 20. sjednice OV jednoglasno usvojen.**

Predsjedavajući OV stavio je na raspravu prijedlog dnevnog reda za 21. sjednicu OV koji je usaglašen na Kolegiju Općinskog vijeća.

Nije bilo rasprave i predsjedavajući OV stavio je na izjašnjanje prijedlog dnevnog reda za 21. sjednicu OV, te nakon izjašnjavanja vijećnika konstatuje da je **jednoglasno usvojen s l i j e d e ć i**

## *Dnevni red*

1. **Izveštaj/Izvešće o izvršenju budžeta/proračuna Općine Vareš za period januar/siječanj – juni/lipanj 2014. godine.**
  - Izvjestilac: Zihnija Krnjić i Senad Mahmutović
2. **Prijedlog Dopune izvješća o štetama na objektima u općoj upotrebi (putna i komunalna infrastruktura i sl.) sa programom sanacije šteta nastalih tokom elementarne nepogode na objektima u općoj upotrebi od 12.06.2014. godine.**
  - Izvjestilac: Ermin Musa
3. **Prijedlog Zaključka o davanju saglasnosti za deponovanje kućnog smeća.**
  - Izvjestilac: Ermin Musa
4. **Izveštaj Komisije za utvrđivanje prometne vrijednosti nepokretnosti za 2013. godinu.**
  - Izvjestilac: Nermin Aščerija
5. **Izveštaj o stanju lokalne i regionalne putne mreže na području općine Vareš.**
  - Izvjestilac: Ermin Musa
6. **Informacija o rekonstrukciji i izgradnji regionalnog puta R-444 Podlugovi – Breza – Vareš – Vijaka – Podkamensko.**
  - Izvjestilac: Ermin Musa
7. **Informacija o ostvarivanju osnovnih i dopunskih prava iz oblasti boračko-invalidske zaštite na području općine Vareš.**
  - Izvjestilac: Rusmir Berberović i Senad Dramalija
8. **Tekuća pitanja**

### **Ad. 1.**

*(Izveštaj/Izvešće o izvršenju budžeta/proračuna  
Općine Vareš za period januar/siječanj- juni/lipanj 2014. godine.)*

Komisija za privredu, finansije i budžet na 6. sjednici održanoj 21.07.2014. godine jednoglasno je donijela slijedeći Zaključak:

- **Stanje proračuna Općine Vareš na polugodišnjem obračunu po dostavljenom Izvješću, jednostavno je alarmantno posmatrajući ostvareni gubitak od 417.000 KM. Malo je vjerovatno da se stanje popravi do kraja godine uzimajući u obzir da su u obračun ušla kreditna sredstva u iznosu od 250.000 KM. Sve značajnije stavke rashoda su prekoračene sa znatnim postocima. Ovim Zaključkom upozoravamo Vijeće, odnosno vijećnike na njihovu odgovornost za ovakvo stanje.**

Otvorena je rasprava u kojoj su svoje primjedbe, prijedloge, sugestije i mišljenja iznijeli vijećnici:

Mahira Brkić u svom obraćanju je izjavila da je Klub SBB nezadovoljan ponuđenim Izvještajem o čemu je dala i pojašnjenje u kome je između ostalog naročito istakla na veliko odstupanje, odnosno podbačaj primljenih tekućih transfera od ostalih nivoa vlasti i

drastičan rast rashoda i izdataka gotovo po svim grupama. Također je podsjetila da je Klub SBB tražio da uz Izvještaj bude dostavljena informacija o potraživanjima i dugovanjima Općine Vareš.

Elvir Rožajac nezadovoljan je Izvještajem o čemu je dao kratko pojašnjenje u kome je skrenuo pažnju na visinu rashoda i izdataka, odnosno na prekoračenje istih u odnosu na planirano.

Demo Kevrić također je izrazio nezadovoljstvo u načinu i visini trošenja budžetskih sredstava u odnosu na planirana. Traži od predlagača obrazloženje o utrošenim sredstvima za puteve, putem analitičke kartice, koliko je koštala rekonstrukcija puta Daštansko-Višnjići, Perunske ulice, puta prema školi i za ostalo što je navedeno u tekstualnom obrazloženju u Izvještaju. Također je tražio pojašnjenja u vezi ekonomskog koda 614129-članarina udruženjima, jednokratne novčane pomoći dodijeljene iz budžeta, sredstvima za raseljena lica kao i sredstvima za elementarne nepogode, prevoz ljudi i slično. U svom obraćanju, u ime Kluba vijećnika BPS i stranke, zatražio je hitnu izradu rebalansa budžeta Općine Vareš za 2014. godini.

Zdravko Barkić u svom obraćanju izjavio je da je stanje alarmantno na osnovu prikazanih podataka prihoda i rashoda u Izvještaju. Sugerisao je predlagaču da ubuduće prilikom razmatranja ovakvih Izvještaja, prije rasprave vijećnika, ovlaštenu predlagač obrazloži pozicije u kojima je došlo do prekoračenja planiranih sredstava. Mišljenja je da je pod hitno potrebno formirati komisiju koja će kroz Rebalans budžeta, koji treba donijeti što hitnije, donijeti plan mjera kako ubuduće sanirati sve dubioze koje su nastale u toku prvih šest mjeseci tekuće godine.

Mario Mirčić u svom obraćanju predložio je Zaključak da se na sjednici u septembru. mjesecu ponudi Rebalans budžeta za 2014. godinu i da se ponude mjere da se zaustavi trend gubitka, odnosno da se poduzmu mjere na sanaciji budžeta.

Ismet Abdulahović u svom obraćanju skrenuo je pažnju da akcenat treba staviti na rashode, jer na prihodovnu stranu se ne može uticati, napominjući da neke stavke u rashodovnoj strani nisu ni planirane. Mišljenja je da ima nezakonitog i netransparentnog trošenja budžetskih sredstava.

Predsjedavajući OV skrenuo je pažnju na diskusije koje se vode prilikom javljanja vijećnika za replike.

Kenan Kamenjaš podržao je sugestiju vijećnika Barkića koja se odnosi na davanje obrazloženja predlagača prije rasprave vijećnika. Mišljenja je da se do kraja godine može popraviti stanje kad je budžet u pitanju te predložio da Vijeće podrži Izvještaj i da jedinstveno nastupa, o čemu je dao pojašnjenje.

Općinski načelnik Avdija Kovačević zahvalio se svim diskutantima i izjavio da prihvata sve diskusije iznesene u raspravi. Izjavio je da je Izvještaj rezultat činjeničnog stanja o čemu je dao i kratko pojašnjenje. Podsjetio je prisutne da sa stajališta Zakona o budžetu i Zakona o izvršenju budžeta, periodični izvještaji nisu izvještaji koji za sobom povlače određene zakonske aplikacije, ali ukoliko bilo tko od vijećnika smatra da ima i za to bilo kakve odgovornosti, da bi bilo korektno da se pokrene odgovornost protiv ovlaštenog predlagača-Općinskog načelnika. Izjavio je da je prijedlog iznesen od strane vijećnika Maria Mirčić korektan, te predložio da Vijeće, ukoliko smatra da postoji mogućnost, prihvati ovaj Izvještaj uz obavezu da se predlagač Jedinostveni općinski organ i Općinski načelnik obavežu da za narednu sjednicu Vijeća koja će se održati u septembru mjesecu, pripreme Rebalans budžeta sa prijedlogom mjera za sanaciju istog do kraja fiskalne 2014. godine.

Demo Kevrić izjavio je da se ne slaže sa pojedinim diskusijama u kojima se navodi da se određene stavke u budžetu mogu sanirati ako su one prekoračene u velikom iznosu u odnosu na planirano.

Predsjedavajući OV dao je pauzu u trajanju pet minuta.

Nastavljeno je sa radom sjednice.

Nije više bilo učesnika u raspravi i predsjedavajući OV zaključio je raspravu.

Predsjedavajući OV stavio je na izjašnjavanje Izvještaj/Izvješće o izvršenju budžeta/proračuna Općine Vareš za period januar/siječanj – juni/lipanj 2014. godine.

Nakon izjašnjavanja vijećnika predsjedavajući OV konstatuje da je sa **11 glasova „ZA“ i 8 glasova „PROTIV“ usvojen**

***Izvještaj/Izvješće o izvršenju budžeta/proračuna  
Općine Vareš za period januar/siječanj – juni/lipanj 2014. godine.***

Predsjedavajući OV na osnovu iznesenog prijedloga u raspravi predložio je i stavio na izjašnjavanje slijedeći

**Zaključak:**

- **Zadužuje se Općinski načelnik i nadležna Služba da za 22. sjednicu Općinskog vijeća pripreme i Vijeću dostave Rebalans budžeta (izmjene i dopune) za 2014. godinu sa Programom mjera za sanaciju budžeta.**

Nakon izjašnjavanja vijećnika predsjedavajući OV konstatuje da je sa **14 glasova „ZA“ i 5 „SUZDRŽANIH“ glasova usvojen predloženi Zaključak.**

**Ad.2.**

*(Prijedlog Dopune izvještaja o štetama na objektima u općoj upotrebi (putna i komunalna infrastruktura i sl.) sa programom sanacije šteta nastalih tokom elementarne nepogode na objektima u općoj upotrebi od 12.06.2014. godine.)*

Otvorena je rasprava u kojoj su svoje prijedloge i mišljenja iznijeli vijećnici:

Mahira Brkić postavila je pitanje vezano za sredstva koja su planirana za sanaciju šteta pod kategorijom „izuzetno hitna sanacija“, odnosno da li su sredstva osigurana pošto rok za sanaciju ističe polovinom augusta mjeseca tekuće godine.

Ismet Abdulahović u svom obraćanju podsjetio je nadležne da postoji veliki odron zemlje na dijelu prema vodovodu Rajovača koji bi trebao da se sanira i po mogućnosti da se uvrsti u dopunu izvještaja o štetama. Također je zatražio od nadležnih da se izvidi mogućnost i uvrsti i saniranje korita rijeke Žahlje koja uvijek prijeti naselju koje se nalazi uz rijeku.

Jasmin Salketić obratio se Vijeću kao vijećnik i predsjednik MZ Dabravine i upoznao prisutne da je sanacija vodovoda u Dabravinama koja je navedena u Izvještaju već završena. Izjavio je da u Izvještaju nedostaje put u Lukama koji je oštećen u dužini od 40-50 metara. Traži od predlagača da se u Izvještaj uvrsti i taj put kao i sanacija rijeke Žahlje i Stavnje.

Kenan Kamenjaš predložio je da nadležne Službe organa uprave sačine jedan presjek svih bujičnih potoka na području općine Vareš, koji ugrožavaju naseljena mjesta, putne komunikacije, odnosno sve objekte od vitalnog interesa i života ljudi, te da se sa jednim

kompletnim projektom sanacije aplicira prema višim nivoima vlasti Kantona i FBiH, kako bi se spriječila dalja oštećenja.

Zatvorena je rasprava i predsjedavajući OV stavio je na izjašnjanje, uz iznesene primjedbe u raspravi, Prijedlog Dopune izvještaja o štetama na objektima u općoj upotrebi (putna i komunalna infrastruktura i sl.) sa programom sanacije šteta nastalih tokom elementarne nepogode na objektima u općoj upotrebi od 12.06.2014. godine.

Nakon izjašnjanja vijećnika predsjedavajući OV konstatuje da je sa **18 glasova „ZA i 1 „SUZDRŽANIM“ glasom usvojena**

***Dopuna izvještaja o štetama na objektima u općoj upotrebi (putna i komunalna infrastruktura i sl.) sa programom sanacije šteta nastalih tokom elementarne nepogode na objektima u općoj upotrebi od 12.06.2014. godine.***

**Ad. 3.**

*( Prijedlog Zaključka o davanju saglasnosti za deponovanje kućnog smeća)*

Predsjedavajući OV podsjetio je prisutne na Zaključak sa prošle sjednice koji je donesen na osnovu vođene rasprave po ovoj tački dnevnog reda, te konstatovao da je na osnovu istog Vijeću dostavljena dopuna materijala.

Otvorena je rasprava u kojoj su svoje primjedbe, prijedloge i mišljenja iznijeli vijećnici:

Elvir Rožajac u svom obraćanju iznio je stav da stranka „Naša stranka“ neće nikad podržati dovoz smeća na općinu Vareš o čemu je dao pojašnjenje, te izjavio da će kao građanin pokrenuti peticiju protiv dovoza smeća sa područja općine Breza na odlagalište općine Vareš, te pozvao građane da ga podrže u istom.

Predsjedavajući OV skrenuo je pažnju da nema potrebe govornicu koristi za besplatno reklamiranje preko Radia Bobovac te podsjetio na prava građana i udruženja u ostvarivanju svojih zahtjeva.

Za repliku se javilo vijećnik Elvir Rožajac a potom Jasmin Salketić.

Mahira Brkić u svom obraćanju podsjetila je na svoju raspravu sa prošle sjednice i na Ugovor o dovozu smeća koji je počeo da važi od 18.12.2013. godine i koji je istekao u junu mjesecu tekuće godine, te izjavila da se smeće i dalje dovozi. Također je dala komentar na sadržaj Izvještaja-dopune od strane JKP d.o.o. Vareš i zamolila vijećnike kao i predlagača, ako je moguće, da se ne pozivaju na ekonomsku računicu o čemu je dala i pojašnjenje, te izjavila da će Klub SBB biti protiv davanja saglasnosti za dovoz smeća.

Tajiba Brkić u svom obraćanju izjavila je da je u razgovoru sa stručnim licima došla do saznanja da deponovanje kućnog smeća na deponiju Kota ne predstavlja opasnost po građane.

Demo Kevrić podsjetio je na svoju diskusiju sa prošle sjednice te dao komentar na dostavljene podatke koji se odnose na prikazana ostvarena finansijska sredstva, odnosno da fakturirani troškovi ne odgovaraju broju tura dovezenog smeća (ili obratno) o čemu je dao i pojašnjenje.

Iznio je stav da Klub BPS neće podržati produženje Ugovora o davanju saglasnosti za deponovanje kućnog smeća sa područja općine Breza na gradsku deponiju općine Vareš.

Kenan Kamenjaš izjavio je da će Klub SDA podržati ovu tačku dnevnog reda.

Ismet Abdulahović u svom obraćanju podsjetio je prisutne na Odluku o provođenju LEP-a u kojem je planirana sanacija deponije „Kota“, te iznio mišljenje u vezi planiranih priprema na uređenju jezera Smreka koje se nalazi ispod deponije.

Općinski načelnik Avdija Kovačević u svom obraćanju upoznao je prisutne da će općina Vareš od razvojne agencije SIDA dobiti novo vozilo-smećaru uz učešće Općine od 15-20%, koja će biti u funkciji do kraja godine. Također uz posredovanje gosp. fra. Mirka Majdandžića, od strane Austrije, općini će biti donirano još jedno vozilo-smećara, tako da će se moći zadovoljiti potrebe naše lokalne zajednice u punom kapacitetu u kontekstu onoga o čemu je gosp. Abdulahović govorio (potpuna implementacija LEP-a). U vezi iznesenih sumnji da se na deponiju „Kota“ dovozi animalni otpad, izjavio je da vjeruje, na osnovu informacija koje ima i izvršenim kontrolama-provjerama, da je na deponiju dovoženo kućno smeće koje apsolutno nije ugrozilo kredibilitet postojeće deponije i nije uticalo na ekološke standarde. U vezi diskusije gosp. Kevrića koja se odnosila na mimoilaženje podataka vezanih za ostvarivanje finansijskih efekata koje je dostavilo JKP d.o.o., izjavio je da se to može i treba provjeriti. Također je dao i pojašnjenje u vezi aktivnosti koje se odnose na jezero Smreka kao geološkom parku.

Elvir Rožajac javio se za repliku u kojoj je izjavio da i dalje uvjeren i misli da dovoz smeća, odnosno deponija „Kota“ ugrožava zdravlje stanovnika općine Vareš.

Mahira Brkić zatražila je od izvjestioca gosp. Musa Ermina da odgovori na pitanja vijećnika postavljena u raspravi a naročito na pitanje gosp. Kevrića koje se odnosi na mimoilaženje podataka za finansijske efekte. Iznijela je mišljenje u vezi diskusije Općinskog načelnika koja se odnosila na informacije-nalaze u vezi kontrole dovoza kućnog smeća.

Općinski načelnik javio se za repliku u kojoj je iznio mišljenje i dao pojašnjenje u vezi inspeksijskih nalaza, rada Jedinog općinskog organa i diskusije gosp. Mahire Brkić.

Mahira Brkić javila se za repliku u kojoj je iznijela mišljenje na repliku Općinskog načelnika i skrenula pažnju na nepoštivanje Poslovnika o radu OV, navodeći odredbe za rok dostavljanja vijećničkih odgovora.

Mario Mirčić u svom obraćanju podsjetio je Vijeće da je na osnovu Zaključka sa prošle sjednice, Vijeću dostavljena dopuna ove tačke dnevnog reda, te citirao određene navode iz Informacije o stanju deponije komunalnog otpada, dostavljene od strane komunalno-građevinskog inspektora.

Za repliku su se javili vijećnici Mahira Brkić i Elvir Rožajac.

Zdravko Barkić u svom izlaganju iznio je svoje lično mišljenje u vezi ove tačke dnevnog reda i općenito u vezi otpada na području općine Vareš kao i podacima koje se od strane općinskih organa dostavljaju Vijeću. Izjavio je u svoje lično ime da će podržati ovu tačku dnevnog reda o čemu je dao pojašnjenje, a ostali vijećnici SDP glasat će po vlastitom izboru.

Zatvorena je rasprava i predsjedavajući OV stavio je na izjašnjavanje Prijedlog Zaključka o davanju saglasnosti za deponovanje kućnog smeća.

Nakon izjašnjavanja vijećnika predsjedavajući OV je konstatovao **da je sa 12 glasova „ZA“, 6 glasova „PROTIV“ i 1 „SUZDRŽANIM“ glasom usvojen**

***Zaključak o davanju saglasnosti za deponovanje kućnog smeća.***

#### **Ad. 4.**

*(Izveštaj Komisije za utvrđivanje prometne vrijednosti nepokretnosti za 2013. godinu. )*

Nije bilo rasprave po ovoj tački dnevnog reda i predsjedavajući OV stavio je na izjašnjavanje Izveštaj Komisije za utvrđivanje prometne vrijednosti nepokretnosti za 2013. godinu.

Nakon izjašnjavanja vijećnika predsjedavajući OV konstatuje da **sa 18 glasova „ZA“ i 1 „SUZDRŽANIM“ glasom usvojen**

***Izveštaj Komisije za utvrđivanje prometne vrijednosti nepokretnosti za 2013. godinu.***

#### **Ad. 5.**

*(Izveštaj o stanju lokalne i regionalne putne mreže na području općine Vareš.)*

Ispred predlagača Ermin Musa pomoćnik načelnika dao je dodatno pojašnjenje u kome je upoznao prisutne da po Zakonu o cestama FBiH, pojam ljetno i zimsko održavanje ne postoji. Zakon poznaje pojam „redovno održavanje“. Također je dao i dodatno pojašnjenje u vezi finansijskih sredstava koja su planirana za usluge opravke i održavanja cesta, mostova i željeznica.

Otvorena je rasprava u kojoj su svoje primjedbe, prijedloge i mišljenja iznijeli vijećnici:

Boško Andrić skrenuo je pažnju na probleme mjesne zajednice Tribija koji se odnose na uništavanje putne komunikacije prilikom izvlačenja trupaca od strane PJ Šumarija Olovo.

Mario Mirčić predložio je da se angažira JKP d.o.o. Vareš na aktivnostima čišćenja kanala – rigola na lokanim cestama (bar svako dvije godine), te da se traži od Kantonalne direkcije za ceste da izvrši horizontalnu signalizaciju tunela.

Elvir Rožajac u svom obraćanju skrenuo je pažnju na oštećenje putne komunikacije Studenac-Ravne-Crna Rijeka-Nišići. Izrazio je sumnju u ispravnost radova na asfaltiranju cesta od strane izvođača.

Demo Kevrić u svom obraćanju izjavio je da nije dobio pojašnjenje od predlagača koje je tražio pod tačkom 1. , koje se odnosi na utrošena sredstva po ekonomskom kodu 613724-usluge opravke i održavanja cesta, mostova i željeznica. Skrenuo je pažnju na stanje putne mreže Striježevo-Kokošćići na mjestima gdje se vrši eksploatacija šume, te iznio mišljenje da se u Izveštaj treba uvrstiti izvlačenje tampona na tu dionicu puta.



Zdravko Barkić u svom obraćanju podsjetio je prisutne da su na svim mjesnim zajednicama općine Vareš, gdje Šumarstva vrše eksploataciju šume, ugrožene putne komunikacije. Smatra da je to generalni problem i da se sa JP ŠPD Zavidovići mora pristupiti rješavanju istog. Napominje da i građani trebaju raditi na očuvanju tih puteva o čemu je iznio i svoje mišljenje. Skrenuo je pažnju da je potrebna izrada elaborata u vezi putnih komunikacija.

Predsjedavajući OV Zdravko Marošević u svom obraćanju kao predsjednik MZ Vijaka upoznao je prisutne sa problemima koji se dešavaju na području te mjesne zajednice, a koji se odnose na uništavanje putne komunikacije prilikom radova od strane Šumarstva. Također je upoznao prisutne o pokrenutim aktivnostima prema višim nivoima vlasti kako bi se spriječilo dalje uništavanje putne komunikacije.

Općinski načelnik Avdija Kovačević upoznao je prisutne da je na traženje organa uprave Općine Vareš, dostavljen Izvještaj kantonalnog inspektora u kome je navedeno da je utvrđeno kršenje Zakona o šumama u smislu privlačenja oblove građe kod putnih pravaca. Na osnovu toga stekli su se uslovi da se pokrene krivična odgovornost prema odgovornim. Također je izvijestio prisutne da će u narednom periodu zajedno sa predsjedavajućim OV pokrenuti krivičnu prijavu protiv rukovodioca PJ Okruglica i Zvijezda zbog nepoštivanja Zakona i zbog ugrožavanja putnih pravaca (Dabravine-Okruglica, Vareš-Zvijezda-Lovački-Očevija-Križevići i Šimin Potok-Kamensko). Upoznao je prisutne da je održan sastanak u Općini Vareš sa pomoćnicima Federalnog ministra za promet i komunikacije gosp. Matoc Željkom i gosp. Boban Pavom, na kome su dogovorene aktivnosti u vezi regionalnog puta, o kojima je i upoznao prisutne.

Poslanik u Skupštini ZDK gosp. Brkić Fahrudin kao rukovodilac PJ Šumarija Vareš, u svom izlaganju je dao određenja pojašnjenja u vezi ove problematike i upoznao prisutne sa problemima sa kojima se preduzeće susreće u svom radu.

Predsjedavajući OV dao je komentar na izlaganje gosp. Brkić Fahrudina u kome je skrenuo pažnju da svi nadležni moraju da se uključe u rješavanje problema koji se odnosi na uništavanje društvene imovine.

Zaključena je rasprava i predsjedavajući OV pozvao je i preporučio nadležnim u svim mjesnim zajednicama na području općine Vareš da sačine pregled stanja puteva u mjesnim zajednicama i isti da upute nadležnim Službama organa uprave kako bi na osnovu tih podataka mogli reagovati prema nadležnim.

Predsjedavajući OV je osnovu diskusije i prijedloga Općinskog načelnika predložio slijedeći

#### **Zaključak:**

- **Zadužuje se Općinski načelnik da pokrene sve mehanizme koji se odnose na zaštitu regionalnih i lokalnih putnih pravaca, te u skladu sa Zakonom pokrene postupak protiv odgovornih zbog nepoštivanja Zakona o šumama i zbog ugrožavanja putnih komunikacija na području općine Vareš.**

Predsjedavajući OV stavio je na izjašnjavanje Izvještaj o stanju lokalne i regionalne putne mreže na području općine Vareš sa predloženim Zaključkom.

Nakon izjašnjavanja vijećnika predsjedavajući OV konstatuje da je **sa 14 glasova „ZA“ i 5 „SUZDRŽANIH“ glasova usvojen predloženi Zaključak i**

***Zvještaj o stanju lokalne i regionalne  
putne mreže na području općine Vareš.***

## Ad.6.

*(Informacija o rekonstrukciji i izgradnji regionalnog puta R-444 Podlugovi-Breza-Vareš-Vijaka-Podkamensko.)*

Nije bilo rasprave po ovoj tački dnevnog reda i predsjedavajući OV stavio je na izjašnjavanje Informaciju o rekonstrukciji i izgradnji puta R-444 Podlugovi-Breza-Vareš-Vijaka-Podkamensko.

Nakon izjašnjavanja vijećnika predsjedavajući OV konstatuje da sa **jednoglasno usvojena**

***Informacija o rekonstrukciji i izgradnji regionalnog puta R-444 Podlugovi-Breza-Vareš-Vijaka-Podkamensko.***

## Ad. 7.

*(Informacija o ostvarivanju osnovnih i dopunskih prava iz oblasti boračko-invalidske zaštite na području općine Vareš.)*

Otvorena je rasprava u kojoj su iznijeli svoje prijedloge, primjedbe i mišljenja:

Elvir Rožajac u svom obraćanju skrenuo je pažnju da svake godine na spisku odobrenih sredstava, pojavljuju se iste osobe, te u vezi s tim uputio je pitanje pomoćniku načelnika za društvene djelatnosti i boračko invalidsku zaštitu koje se odnosi na kriterije za dodjelu novčanih sredstava za jednokratnu novčanu pomoć i nabavku udžbenika.

Jasmin Salketić u svom obraćanju ispred Kluba SDA izjavio je da će Klub podržati Izvještaj. Mišljenja je da spisak lica kojima su odobrena sredstva, ne treba da se nalazi u Izvještaju o čemu je dao i pojašnjenje.

Ismet Abdulahović u svom obraćanju predložio je da Vijeće donese zaključak kojim bi se ispred Općinskog vijeća uputila urgencija Ministarstvu za boračka pitanja ZDK da što hitnije pristupi realizaciji svih odobrenih a neisplaćenih sredstava – transfera iz 2013. godine za boračku populaciju na općini Vareš.

Predsjedavajući OV Zdravko Marošević izjavio je da uvažava diskusije vijećnika. Skrenuo je pažnju da sva Udruženja na području općine Vareš, koja su proistekla i rata, moraju imati zajednički stav i jedinstveno djelovati prema višim nivoima Vlasti u ostvarivanju svojih prava. U vezi s tim predložio je da Udruženjima proisteklim iz rata sa nadležnim, trebali pripremiti i Vijeću dostaviti jedinstven stav i zahtjeve, kako bi Vijeće tome dalo podršku i isto uputilo nadležnom ministarstvu.

Ispred predlagača Rusmir Berberović pomoćnik načelnika u svom obraćanju dao je dodatna pojašnjenja i odgovorio na postavljena pitanja vijećnika u raspravi.

Mahira Brkić u svom obraćanju dala je pozitivnu kritiku Službi na izradi Informacije, a sve zbog javnosti i transparentnosti podataka. Mišljenja je da treba inicirati na izmjenama kriterija za dodjelu sredstava koja se dodjeljuju boračkoj populaciji, o čemu je dala pojašnjenje.

Ispred predlagača Rusmir Berberović pomoćnik načelnika javio se za riječ i dao neka pojašnjenja koja se odnose na kriterije za dodjelu sredstava.

Predsjedavajući OV predložio je i pozvao sva Udruženja proistekla iz rata da organizuju sastanak i pozovu pomoćnika ministra za boračka pitanja ZDK, koji bi sa zajedničkim stavovima Udruženja, upoznao ministra za boračka pitanja u ZDK.

Predsjedavajući OV konstatovao je da je **Vijeće primilo k znanju**

***Informaciju o ostvarivanju osnovnih i dopunskih prava iz oblasti boračko-invalidske zaštite na području općine Vareš***

Predsjedavajući OV predložio je i stavio na izjašnjavanje slijedeći

**Zaključak:**

- **Ispred Općinskog vijeća poslati dopis-urgenciju Ministarstvu za boračka pitanja ZDK da se što prije realizuju donesena rješenja za 2013. godinu, odnosno da se izvrši isplata svih odobrenih sredstava za boračku populaciju na općini Vareš.**

-  
Nakon izjašnjavanja vijećnika predsjedavajući OV konstatuje da je **jednoglasno usvojen Zaključak.**

**Ad. 8.**

*(Tekuća pitanja.)*

1. Predsjedavajući OV upoznao je prisutne da je Vijeću od strane UG „Čuvari bosanske krune Bobovac“ dostavljen Zahtjev za pokretanje procedure donošenja Inicijative o proglašenju Parkom prirode sliva rijeke Bukovice, pod jedinstvenim nazivom „Bobovačka dolina“, broj: 01-JL/14 od 15.07.2014. godine. Zahtjev je dostavljen i predsjednicima Klubova. Skrenuo je pažnju da u skladu sa Statutom općine Vareš i Poslovníkom o radu OV (član 105.), dostavljenu Inicijativu, predsjedavajući OV upućuje Općinskom načelniku, koji je dužan da u roku od 15 dana o istoj se očituje i upozna Općinsko Vijeće.

Za riječ se javila zamjenica predsjedavajućeg OV Mahira Brkić koja je izjavila da podržava navedeni Zahtjev, te prisutne upozнала sa članom 146. i 151. Zakona o zaštiti prirode FBiH koji se odnosi na postupak podnošenja Inicijative o proglašenju zaštićenog područja. Uputila je sugestiju da Vijeće postupi po zakonskim procedurama koje je citirala.

Predsjedavajući OV ponovo je skrenuo pažnju na dužnosti i obaveze Općinskog vijeća i Općinskog načelnika u vezi postupka razmatranja Inicijative u skladu sa aktima Općinskog vijeća.

Za riječ se javio sekretar OV Leon Pavlović koji je prisutne podsjetio na članove 104. i 106. Poslovníka o radu OV koji se odnose na predlaganje i donošenja akata.

Zamjenica predsjedavajućeg OV Mahira Brkić javila se za riječ i dala pojašnjenje u kome je iznijela razlog zbog čega je Vijeće upozнала sa odredbama Zakona o zaštiti prirode FBiH, koji se odnose na proceduru u vezi podnošenja Inicijative.

Za riječ se javio pomoćnik načelnika za društvene djelatnosti i boračko invalidsku zaštitu Rusmir Berberović koji je u svom obraćanju iznio svoje mišljenje u vezi podnesenog zahtjeva koji u potpunosti podržava.

Predsjedavajući OV je konstatovao da je Vijeće **primilo k znanju Inicijativu-Zahtjev UG „Čuvari bosanske krune Bobovac“, te zadužio Općinskog načelnika da u skladu sa aktima Općinskog vijeća, očituje se o istoj.**

Predsjedavajući OV izvijestio je prisutne da nema više pristigle pošte sa kojom bi upoznao Vijeće, te zamolio sve Službe organa uprave da na dopise koji su upućeni Vijeću od strane građana, očituju se po istim i na vrijeme upute odgovor podnosiocima dopisa i upoznaju Vijeće sa istim.

2. Vijećnik Elvir Rožajac upoznao je Vijeće da je jednoj porodici u Pomeničima MZ Dabravine, prilikom nedavne elementarne nepogode zbog zaraze uginula krava. Porodica je obavijestila nadležne u Općini o istom, te u vezi s tim traži od nadležnih

da odgovore da li oštećena porodica može da ostvari neki vid naknade ili donacije i kome da se po istom pitanju obrati.

3. Vijećnik Mato Pavić izjavio da materijal za današnju sjednicu nije dobio na hrvatskom jeziku i da nije imao problema prilikom isčitavanja istih.
4. Vijećnik Đemo Kevrić podsjetio je Vijeće na Zaključak Kolegija OV od 23.07.2014. godine, po kome je zadužen Općinski načelnik da za današnju sjednicu OV, Vijeću dostavi pisanu Informaciju o dosadašnjim aktivnostima vezanim za realizaciju Presude Ustavnog suda u vezi Zakona o šumama ZDK. U vezi s tim zatražio je odgovor koji je razlog zašto spomenuta Informacija nije dostavljena za današnju sjednicu.

Predsjedavajući OV izvijestio je prisutne da je tražena Informacija dostavljena vijećnicima za današnju sjednicu i da se nalazi pod tačkom13. Informacije o radu Općinskog načelnika i JOO Vareš u proteklom periodu, broj: 02-778/14 od 25.07.2014. godine.

Vijećnik Đemo Kevrić javio se za riječ i iznio mišljenje u kome je izjavio da je Informacija koja je dostavljena a odnosi se na pokrenute aktivnosti po Presudi Ustavnog suda FBiH štura, o čemu je dao pojašnjenje.

5. Zamjenica predsjedavajućeg OV Mahira Brkić zamolila je predstavnike Izvršne vlasti da u skladu sa svojim mogućnostima angažuje nadležne na čišćenju šiblja oko stepeništa pored K-objekata koje vode od gradskog parkirališta u ulici Korovinjići prema MUP-u. U svom obraćanju zamolila je predsjedavajućeg OV da Izvršnoj vlasti i predstavnicima JOO organa uprave Općine Vareš, ne dozvoli omaložavanje vijećnika i ironično podsmijavanje, o čemu je dala i pojašnjenje.

Predsjedavajući OV je izjavio da nije primijetio ponašanje vijećnika protivno kodeksu. Pozvao je sve vijećnike da prisustvuju Svečanoj sjednici OV u povodu Dana općine Vareš, koja će se održati 16.08.2014. godine (subota) u 16,00 sati u Velikoj sali Općine Vareš.

Sastavni dio ovog Zapisnika je audio zapis sjednice.

Sjednica je završena u 20,10 sati.

**SEKRETAR**

**Leon Pavlović**

**ZAPISNIČAR**

**Azra Ibrahimović**

**PREDSJEDAVALAČICA**

**Zdravko Marošević**